

Visoki predstavnik poziva na odgovornu predizbornu kampanju

S današnjim početkom predizborne kampanje za općinske izbore, visoki predstavnik Valentin Inzko je pozvao političke stranke i lidere da, do održavanja izbora 7. oktobra, konstruktivno i odgovorno vode predizbornu kampanju koja će biti okrenuta budućnosti.

Visoki predstavnik je podsjetio sve kandidate i stranke da se izborna pravila moraju poštivati i da se suzdrže od davanja izjava kojima se širi mržnja i potiče netolerancija na etničkoj, vjerskoj i svim drugim osnovama. Visoki predstavnik je apelirao na političke subjekte da izbjegavaju retoriku koja poziva na podjele i upozorio da se ne koriste aktivnostima kojima se dovodi u pitanje Mirovni sporazum i koje bi, posebno u periodu predizborne kampanje, dodatno pogoršale političku atmosferu i time dovele do aktivnog ugrožavanja napora da Bosna i Hercegovina krene naprijed, između ostalog, i prema potpunoj evroatlantskoj integraciji, kao cilju koji podržavaju građani ove zemlje.

Inzko je podsjetio da su se sve političke stranke obavezale na održavanje slobodnih i fer izbora. „Dužnost političara koji se kandidiraju na izborima je da vode kampanju zasnovanu na konkretnim pitanjima, koja će se fokusirati na pretvaranje lokalnih zajednica u mjesta na koja građani mogu biti ponosni što u njima žive. Građani žele znati kako će političari koji se kandidiraju na izborima osigurati poboljšanje životnog standarda za njih, njihovu djecu i sredinu u kojoj žive“, rekao je visoki predstavnik.

Visoki predstavnik je apelirao na građane da dobro pogledaju oko sebe tokom predizborne kampanje prije nego što popune svoj

glasački listić:

„Jeste li zadovoljni načinom na koji se razvija sredina u kojoj živite i uslugama koje vam pružaju lokalne vlasti? Odvozi li se smeće? Jesu li ulice čiste? Rade li lokalne službe? Rade li lokalne vlasti sve što mogu kako bi sredina u kojoj živite postala atraktivna za ulaganja? Da li se prihodi od poreza na lokalnom nivou troše na ispravan način? Da li se oni agresivno bore protiv korupcije i rade na kreiranju većih mogućnosti za otvaranje novih radnih mjesta? Ovo su neka od pitanja koja političari, koji se na izborima kandidiraju za funkcije, moraju objasniti. Razmislite o tome ko ima najbolji i najkredibilniji plan za razvoj sredine u kojoj živite.

No, prije svega, želim iskoristiti ovu priliku da apeliram na sve birače u Bosni i Hercegovini da na dan izbora izađu na birališta i glasaju. Na izborima, 7.oktobra, imate moć u vidu glasačkog listića. Apeliram na vas da je iskoristite.“